

Tito

1 Pablohájpøch høøch. Ja'a Dióshøch xmioonsähajp. Ja'a Jesucristøch xquiuguexyhajp. Jadúhnhøch tøø xwyiinguexy coöchä jäya'ayä Diosmädia'agy nyajwiinhixó'owät, pønhatiä Dios tøø wyiimbiy, ween hajxy jaduhñ miäböcy, weenä tøyhajt hajxy jaduhñ miøødhaty, jaduhñä Dios hajxy hoy wyiingudsähgó'owät. ²Jéquiänä Dios hajxy xyajwiinwaanøøyyäm coo hajxy xyagjugyhadäänäm cøjxta'axiøø neby je'e jjugyhatiän. Cabä Dios mänaa yhøhnda'agy, jaduhñä tøyhajt hajxy nmøødhájtäm coo hajxy jaduhñ xyagjugyhadäänäm. ³Coo yhabaaty, mäniä Dios hajxy jaduhñ xyhawáanäm coo hajxy jaduhñ xyagjugyhadäänäm. Tøøchä Dios jaduhñ xyhane'emy coöchä miädia'agy jaduhñ nyajwá'xät. Xtiehm wyiinguéjxhøch jaduhñ. Ja'a Dios hajxy xyajnáhwaats xyajcuhwáatsäm. ⁴Tito, míichhøch hädaa nocy nyajnájaayøøby. Tehm tiøyhájthøch miich njwø'øy nébiøch nhamdsoo huungän. Tu'cuhdujt højtsä Diosmädia'agy nmäböjcm. Ja'a Diosteedy møødä Wiindsøn Jesucristo, ween miichä mayhajt hajxy xtiunä, ween miichä

hoyhajtä weenhajt hajxy xmio'oy. Ja'a Jesucristo hajxy xyajnáhwaats xyajcuhwáatsäm.

⁵Mánáajøch jim nwiimbitiän Creta, páadyhøch miich jim nyajmähmøøyy coo mjaac yaghoyó'owät tijaty højts hänajty nga'a yajpéjtäpnä. Jadúhnhøch miich nhane'emy coo wiindsøn mbädá'agät maa tsajtøjcän wiinduhmyhagajpt. ⁶Je'e mbädá'agäp pøn hoy jäya'ayhajp, pøn to'oxiøc tu'ug yaghijp, pøn yhuung mäböjpä Diosmädia'agy, pøn yhuung hoy wädiip, pøn yhuung mädia'agymiäböjp. ⁷Ja'a jäya'ayhajxy jaduhñ tunaambä wiindsøn, ja'a Dios hajxy moonsähadäänäp. Howyiinmahñdy hajxy yaghídäp. Cab hajxy jiootmøjhädät. Cab hajxy yhawa'andá'agät. Cab hajxy yhu'ug cab hajxy jiøø'xät. Cab hajxy chiptsögät. Cabä jäya'axiädø'øn hajxy yhadsögät. ⁸Yajtøjtägø'owäp hajxy pønjaty mejtsp maa tiøjc-hajxiän; piu'umió'owäp quioñdymó'owäp hajxy jaduhñ. Chógäp ja'a hoybä hajxy. Cab hajxy choj jootmä'adät. Hoy hajxy jiäya'ayhädät. Hoy ja'a Diosmädia'agy hajxy quiudiünät.

Cabä haxøøgwiinmahñdy hajxy yajtúnät. ⁹Cabä tōmiädia'agy hajxy ñajtshixó'owät, ja'a hajxy tøø yajñähixó'oyíjábä, jaduñä mabøjpädøjcä hoguiuhdujt hajxy yajwiingapxó'owät. Jaduhñ hajxy yajcähxó'ogät coo häna'c-hajxy yhøhñda'agy, ja'a wiingmädia'agy hajxy yajñähixøobiä.

¹⁰Nämayyä høhñdaacpähajxy wiädity. Cabä Diosmädia'agy hajxy quiudiuna'añ. Nä'a nägoodä hajxy jaduññ ñä'a capxy ñä'a mädia'agy. Jaduhñä häna'c-hajxy nämay jiatcøobiä, ja'a hajxy jaduññ mänaambä coo ja'a mabøjpädøjc-hajxy tsipcøxp yajcircuncidarhädät. ¹¹Tsipcøxp myaghamónät pønjaty jaduññ wiing yajñähixøoby. Cabä cuhdujt hajxy miøødä coo hajxy jaduññ wiing yajñähixó'owät. Yajmäjuyaamb hajxy, paady hajxy jaduññ wiing yajñähixó'oy. Höchähdiuunnä hajxy jaduññ jiatcø'oy. Haa ja'a mabøjpädøjcä wiingmädia'agy hajxy jaduññ yajñähixøoyyabä, naxy hajxy jaduññ yajtu'udägoyyii, ja'a hajxy tu'jøøn tu'tøjcpä.

¹²Jaduññä Cretabäjäya'ay tu'ug tøø yhuuc mänaambä coogä miägunaaxhajxy jiaanč tehñ yhøhñda'agy, møød coog hajxy hanaxiä quiahwiindøyyä, møød coog hajxy jiaanč tehñ quiaxä, møød coog hajxy jiaanč tehñ ñuuxho'ogy. Jaaya'ay jaduññ tøø miäná'añbä, profeta hijty tiuumby. ¹³Tehñ tiøyhajt jaduññ coo ja'a Cretabä-jäya'ayhajxy jaduññ haxøøg jiaja'ayhaty. Paady miich møc-haamby mhøj mmägápxät, weenä Diosmädia'agy

hajxy jaduññ hoy miäböcy. ¹⁴Cabä høhñda'agymiädia'agy hajxy miøjpädá'agät, ja'a judíoshajxy naxy yajñähixøobiä. Møød weenä mädia'agy hajxy quia'a cudiuñ nebiä häna'c-hajxy jia hane'emiän, ja'a tøyhajt hajxy ca'a tsojpä.

¹⁵Ja'a häna'cä howyiinmahñdy hajxy møødpä, cumáayyabä Dios hajxy jaduññ, hoy hajxy quia'a ja cudiuñ nebiä häna'c høhñdaacpähajxy jia hane'emiän. Pero ja'a häna'cä Diosmädia'agy hajxy ca'a mabøjpä, caba Dios hajxy quiumayii je'eguiøxpä coo haxøøgwiinmahñdy hajxy jiaanč tehñ miøødä. Cab hajxy tii hoy ñänømy. ¹⁶Jaduññ hajxy jia mäna'añ cooc tyjy ja'a Dios hajxy yhixyhaty, pero coo hajxy haxøøgjaty wyl'i jiatcø'oy, jaduññ hajxy yajcähxó'ogy coo hajxy tøyhajt quia'a hixiä. Cabä Diosmädia'agy hajxy quiudiuna'añ. Cabä hodiung hajxy ñä'ägädä jada'añ. Paady hajxy xiøøghadyii ja'a Dios.

2 Pero miich, ja'a hoguiuhdujt myajñähixó'owäp, jaduññä mabøjpädøjcä Diosmädia'agy hajxy hoy quiudiúnät. ²Jaduññä majjäya'adiøjc myajwiinxiic myajwiingapxó'owät coo hajxy quia'a hu'ug quia'a jøø'xät. Cab hajxy nä'a nägoodä ñä'a xi'ig ñä'a hanähátät. Hoy hajxy jiaja'ayhädät. Hamuumdu'jootä Diosmädia'agy hajxy miäbögat. Hoy ja'a miäjøøn miädøjc hajxy choc pia'häyówät. Miece'xtúgáp hajxy coo hajxy hñajty chaächpøcy. ³Jaduññä tajhoctøjc myajwiinxiic myajwiingapxøobiät

coo howyiinmahñdy hajxy miøðhádät, jaduñ hajxy hoy quiuhdujthádät. Cab hajxy pøn ñähøñó'owät. Cab hajxy yhu'ug cab hajxy jiøø'xät. Ja'a hoybä weenbä hajxy yajñähixó'owäp. ⁴Jaduñnä tajhoctøjcä miädsaan miädo'oxy muutspä hajxy yajwiinxiiic yajwiingapxó'owät coo ja'a yhuung coo ja'a ña'ay hajxy chógät, ⁵møød coo hajxy hoy jiäya'ayhádät. Ja'a howyiinmahñdy hajxy miøðhádäp. Hoy yajxonä jiøøn tiøjc hajxy cwieendähádät. Miøðhádäbä hojioot hajxy. Wyiingudsähgó'owäbä ñihyhap hajxy. Coo hajxy jaduñ hajxy quiuhdujthádät, jaduñnä cu'ugä Diosmädia'agy hajxy wyiingudsähgó'owät.

⁶Jaanä jaduñduhmbä, jaduñnä muutsc-häna'ctøjc myajwiinxiiic myajwiingapxó'owät coo howyiinmahñdy hajxy miøðhádät. ⁷Jaanä jaduñ miichpä, tehngajnä hoy mwädítät, weenä mäbøjpädøjc jaduñ xpiahixy. Howyiinmahñdymøød myajñähixó'owät. Caj nä'ä nägoodä mnä'ä xi'ig mnä'ä hanähátät. ⁸Ja'a hoguiapxy ja'a homiädia'agy jaduñ myajñähixó'owäp, jaduñ pøn xquia'a jøjcapxó'owät. Jaduñnä nmädsiphájtämhajxy chähdiúnät, cab hajxy jaduñ hoy xñänøømämät haxøøg.

⁹Hoorä, ja'a häna'c-hajxy hijpä cudoogø'oyä, jaduñ myajwiinxiiic myajwiingapxó'owät coo ja'a wyiindsønä miädia'agy hajxy pedyii quiuidiuun quiuñáxät, hoy hajxy nä'ä waambaty yhane'emyii. Cab hajxy yhadsoowiimbídät. ¹⁰Cab

hajxy miéedsät. Hamuumdu'jootä wyiindsønä miädia'agy hajxy yajtúunät, ween hajxy jaduñ quiumayii, wehñdä wyiindsønä Dios miädia'agy hajxy jaduñ xmiäbøjcät. Ja'a Dios hajxy xyajñähwaats xyajcuhwáatsäm.

¹¹Hix, tøø ja'a Dios jaduñ yajcähxø'ogy coo ja'a mayhajt tøø tiuñ, coo hajxy nägøxiä xyajñähwaats xyajcuhwáatsäm, mäduhñtiä hajxy yaa nhíjtäm hädaa yaabä naaxwiin. ¹²Jaduñnä Dios hajxy xyhanéhäm coo ja'a haxøøgwiinmahñdy hajxy nnajtshixó'oyyämät møødä hadsojtwiinmahñdy, møød coo ja'a howyiinmahñdy hajxy nyaghíjtämät møødä hoguiuhdujt, møød coo ja'a Dios hajxy hamuumdu'joot nwiingudsähgó'oyyämät, jaduñ hajxy hoy nwädíjtämät hädaa yaabä naaxwiin, ¹³je'leguiøxp coo ja'a Jesucristo hajxy jaduñ njøbhíjxäm coo yaa quiädaactägatsa'añ neby hajxy tøø xyajwiinwaanø'oyyäm. Xi'ig xon hajxy jaduñ njøbhíjxäm. NDioshájtäm ja'a Jesucristo hajxy jaduñ. Møj jaanäh je'e. Je'e hajxy xyajñähwaats xyajcuhwáatsäm. Yajxon jiaanäh tehñ quiäda'aga'añ. ¹⁴Paady hajxy hoy xñähho'tútäm, jaduñnä haxøøg ca'a hoybä hajxy xquiøxy yajñähwaats xquiøxy yajcuhwáatsäm. Jaduñ hajxy xqui'u'ughájtäm, weenä hoybä weenbä hajxy jaduñ hamuumdu'joot ndúunäm.

¹⁵Jaduñdsä mäbøjpädøjc myajwiinxiiic myajwiingapxó'owät coo hajxy jaduñ miäbøgät. Mmøød miichä cuhdujt jaduñ coo mhøj coo mmägäpxät pøn

ca'a mǎbøgaamb, jaduñ mga'a yajpéxát.

3 Jaduñnä mǎbøjpädøjc myagjahmiejtstá'agát coo ja'a gobiernähajxy wyiingudsähgø'øwóøjät møødä cuduunghajxy, møød coo ja'a miädia'agyhajxy quiudiúunäxát. Cabä mǎbøjpädøjc-hajxy ñuuxhó'ogát. Tiúnäp ja'a cu'ugtuung hajxy. ²Cab hajxy pøn ñähøønó'øwát. Cab hajxy chiptsógát. Mee'xxieemy hajxy jiäya'ayhádát. Hoy piønä hajxy wyiingudsähgø'øwát.

³Hix, hijty, cabä Diosmädia'agy hajxy hijty nwiinjuóøyyäm. Cab hajxy hijty ngudiúunäm. Tu'udägóøyyäm hajxy hijty. Hanaxiä haxøøg ca'a hoybä hajxy hijty nhadsójcäm. Haxøøg hajxy hijty njäya'ayháltäm. Hadsojtwiinmahñdy hajxy hijty nyaghjítäm. Xxiøøgháltäm ja'a cu'ug hajxy hijty. Hamiñ haxøpy hajxy hijty nnimiähän nnimiägø'øwháltäm. ⁴⁻⁵Pero mänitä Dios yajwiingähxø'cy coo hajxy xñäxúu'tsäm, møød coo hojioot jiaanč tehñ miøødä. Mänit hajxy xyajñähwaats xyajcuhwáatsäm coo hajxy jaduñ xñäxúu'tsäm, ca'a jie'eguiøxpä cooc tyijy hajxy hoy tøø ngudiúunäm. Jaduñ hajxy xyajñähwaats xyajcuhwáatsäm coo hawiinjemyjioot coo hawiinjemywiiinmahñdy hajxy xmióoyyäm, møød coo ja'a DioshEspíritu hajxy xyageem xyajtägátsäm. ⁶Coo ja'a Jesucristo hajxy hoy xñähho'túutäm, jaduñnä Dios ja'a yhEspíritu hajxy møj may xmióoyyäm. ⁷Paadiä Dios

ja'a yhEspíritu hajxy xmióoyyäm, jaduñ hajxy xpiädáacäm hawa'adstuum. Møjjä mayhajt hajxy jaduñ xtiúunäm. Møød jaduñ hajxy xyagjugyhadáanäm cøjxta'axiøø nebiä Dios jiugyhatiän. Jaduñ hajxy tøø xyajwiinwaanóøyyäm. Paady hajxy jaduñ njøbhíjxäm.

⁸Tehñ tiøyhajt jaduñ. Naxy miichä mǎbøjpädøjc jaduñ mdehñ miägaxp mdehñ yhané'emát coo hajxy hamuumdul'joot hoy quiuhdujthádát, ja'a Diosmädia'agy hajxy tøø miäbóquiäbä. Tehngajnä hoybä weenbä hajxy tiúnät. Tsoobaatp jaduñ. Jaduñ hajxy ñiyaghoyø'øwóøjät. ⁹Pero caj myajtägø'øwát maa ja'a høhnda'agymiädia'agy hajxy naxy yajcapxiø'øyän, maa ja'a jecyquiuhdujt hajxy naxy yajtsipta'aguiän, maa ja'a jecyjiäya'ay xiøø hajxy naxy yajtøøw yajtøø'xän. Cab jaduñmä capxy mädia'agy jaduñ ñä'ägädä tuungpaady.

¹⁰Jii häna'c-hajxy näje'e maa ja'a tsajtojcän, wiingjaty hajxy yajñähixø'øy. Y coo ja'a mǎbøjpädøjc-hajxy jaduñ näje'e miäböcy, tu'udägooby hajxy jaduñ. Cabä jiamioød hajxy hoy miøødhijnä tu'ugmädia'agy. Pønjaty jaduñ wiingjaty yajñähixøøby, mhójpä jaduñ tähooc metsc-hooc, ween hajxy yhuuc hamoñ. Y pø cab hajxy jaduñ yhamona'añ, mänit mga'a mämøjø'øwát mga'a mämayø'øwát. ¹¹Pønjaty jaduñ jatcøøby, cabä howyiinmahñdy hajxy miøødä. Haxøögä wyiinmahñdyhajxy jaduñ. Paady hajxy haxøøgtuum piäda'aga'añii.

¹² Jímhøçhä Artemas nguexa'añ maa miiçhän. Coö ja'a Artemas jaduñ quia'a yajnäbaadø'owät coö jim ñócxät, mänitøçhä Tíquico mäböcy jim nguéxät. Coö jim miédsät, mänitøch miiçh jim nøcxy xpiaady Nicópolis. Jímhøch nhida'añ høxtä coö tøøchpä ñáxät. Mhuuc hadø'ødsäp jaduñ. ¹³ Jimä Apoloshajxiäda'a wiädity Creta møødä Zenas, ja'a cuhdujtyajnähixøøbiä. Coö hajxy hånajty tiu'ubøga'añ, mänit miiçh cøxiä wiinä mmó'owät tijaty hajxy hånajty yajmaajiadaamby. ¹⁴ Jaduñä njamiøødhájtäm

myajwiinxiic myajwiingapxø'owät coö ja'a hoyba weenba hajxy tehngajnä tiúnät, ween hajxy jaduñ piuhbety pøn hånajty yajmaajiajp. Cab hajxy ñä'ä nuuxhó'ogät.

¹⁵ Ja'a njamiøødhøch hajxy yaa xmiøødhijpä, xyhaagä yajpoo'xp miiçh jaduñ. Huuc tunä mayhajt, huuc yajpoo'x ja'a høøçhcøxpä pønjaty højts jim xchojp xpia'häyoob ja'a Diosmädia'agyquiøxpä. Ween mijtsä Dios ja'a hoyhajtä weenhajt xmiø'oy nägøxiä. Amén.